



閩／懷想／☆☆☆★

西瓜皮

熱天來一砸仔西瓜，真正是透心涼開心花。阮兜紅紅的西瓜切好捧上桌頂一人一砸，邊仔一定有另外一盤西瓜皮。講來毋驚人笑，因為我是艱苦大漢，個性是無到「儉儻仔」的地步，毋過，萬項拈拾，驚拍損；厚厚青青猶一層粉紅仔粉紅西瓜肉的皮，是我留欲那看報紙，那慢慢仔齧。人講果子倚皮的所在酵素有較濟，我是無遐頂真，只是感覺無彩，會食得的物件，毋通討債。

細漢定聽大人講，摸蜊仔兼洗褲，食西瓜掛(kuà)洗面。兩句攏有一兼二顧的趣味笑談，嘛拄好講，去溪裡摸蜊仔耍水抑是食涼涼涼、水水水的西瓜，攏是熱人一番(ih-tsih-báng)的享受。摸蜊仔耍水無夠氣，轉來驚身軀有味，閣會去水協仔洗盪予清氣，全款嘛是貪涼愛耍水。食西瓜哪會掛洗面咧？早前的生活較粗魯，西瓜是切一周一周大大塊，定定嘛比面模仔較闊，囡仔人喙仔細細粒仔，手捧彼周西瓜，佇肉頂懸正片擡過來，倒片擡過去，閣西瓜厚汁勢滴，囡仔人跤手無夠扭掠，趕緊欲軟湯，攏嘛頭向向拍拚食，有聽著規陣囡仔食甲窸窣叫的聲，無看著鼻目喙的影，食煞，攏嘛囡甲規面澹糊糊、糊嘎嘎，心內一直喝好食好食。

細漢阮兜較欠缺，阮兄弟姊妹攏誠拈拾咧齧西瓜，甚至食到袂甜白白的內皮閣毋甘擲，會提來抹面消癢好耍，嘛會提去啗金龜，抑是交予阮媽媽，共青青的粗皮削掉煮湯。我一直攏毋敢食西瓜皮煮湯，因為雖然有洗過煮過，毋過頂懸一定有足濟人的喙瀾佇咧。

當我手提西瓜皮無閒咧齧，阮查某团手捧彼砸我切甲若冰角的紅西瓜，欲飼我食一塊。足感心的！做老母的犧牲了有價值囉！伊知影我的西瓜故事，了解我是拈拾賢慧，會食的莫拍損，好食的留予逐家。「燒瓷的食缺，織蓆的睏椅」，莫怪切西瓜的齧皮。伊閣淡薄仔歹勢、笑笑仔共我談：「我知影阿母上愛食西瓜皮，美濃瓜子，樣仔子，菝仔子，梨仔心……」

作者：王秀容

☆詞彙學習☆

【拈拾】khioh-sip：節儉

【熱人】juah--lâng：夏天

【討債】thó-tsè：浪費、糟蹋

【水協仔】tsuí-hiáp-á：手動抽水機

【掛】kuà：連帶、附加

【啗】siánn：引誘